

**Jamhuuriyadda Federaalka Soomaaliya**  
**Maxkamadda Sare Ee Dalka**  
**Qeybta Maamulka**

Sum: MS/I/3/2021 BG

Sum: MS/I/ 26 /2021 BX



Tr/18/09/2021

Xukun

Magaca Dadweynaha Soomaaliyeed

Maxkamadda Sare ee Dalka qeyteeda Maamulka oo ka kooban Garsooreyaasha kala ah:

1. C.Xaq Sh. Cumar Maxamed \_\_\_\_\_ Guddoomiye.
2. Cabdulqaadir Idiris Ciise \_\_\_\_\_ Xubin.
3. Cabdiqafaar Xuseen Isaaq \_\_\_\_\_ Xubin.

Kaaliyana u yahay: C/najiib Xersi Culusow,

Waxa ay dhageysatay fadhiyadeedii ku kala taariikheysnaa: 16/06/2021 iyo 03/08/2021 dacwad Maamul ah oo summaddeedu tahay MS/I/3/2021 BG, una dhexeeysa dhinaciyyada kala ah:

1. Maxamed Xuseen Cali, Xuseen Xasan Colow iyo Cabdinaasir Maxamed Xasan \_\_\_\_\_ Cabtayaal.  
Qareen: Cabdiraxmaan Xaaji M. Ereg, Wakaalad: tr.13/12/2020 iyo 102/2021 tr.24/06/21.

Lid

2. Xafiiska Hantidhawrk Guud \_\_\_\_\_ Laga Cabte.

Qareen: Garyaqaanka Guud ee Dowladda oo uu matalayo Cabdullaahi Cali Hilowle.



## dulucda dacwadda iyo sida ay wax u dhaceen:

Qareenka soo cabtayaasha ayaa cabashada ku taariikheysan 13/07/2021 ii soo qaatay Maxkamadda Sare, isagoo cabasho ka soo qaatay go'aanka maamul ee ka soo baxay Hanti-dhowraha Guud ee Qaranka ee sum: XHG/HG-177/2020 ee tr. 15/07/2020, kaas oo shaqada looga saaray soo cabtayaasha.



Mowduuca dacwaddu waxa uu ku saabsan yahay go'aankaa Maamul ee sare ku xusan ee ka soo baxay Xafiiska Hanti-dhowrka Guud. Go'aankaas maamul ayaa soo cabtayaasha shaqada looga saaray iyadoo lagu eedeyay falal isugu jira in ay ka qaateen shidaal iyo lacag Wasaaradda Caafimaadka oo baaris loogu diray iyo in qaarkood looga shaqaalaysiiyay shaqaale isla Wasaaradda Caafimaadka sida ku xusan go'aanada kala dambeeyay ee shaqada looga saaray soo cabtayaasha.

### Asbaabta cabashada iyo dooddii qareenka soo cabtayaasha

Nuxurka cabashada uu soo qaatay qareenka soo cabtayaashu iyo dood-afeedkii uu ka jeediyyay garmaqalladii dacwadda waxa uu u dhignaa sidan soo soo socota:

- In soo cabtayaashu ay ahaayeen saraakiil ka tirsan Shaqaalaha Rayidka ee Dowladda gaar ahaan Xafiiska Hanti-dhowrka Guud.
- In soo cabtayaashu ay ku waayeen shaqadii dowladda iyo xilalkii ay ka hayeen Xafiiska Hanti-dhowrka Guud si xaq darro iyo xadgudub weyni ku jirto oo xuquuqdoodii iyo sharafkoodii meel looga dhacay, loona maray shaqa ka saaristooda habraac khaldan oo khilaafsan Xeerka anshax-marinta.
- In Shaqaalaha Dowladda looga saari karo shaqada oo kali ah Xeerka Wasiirka koowaad, laguna meel mariyo go'aanka Golaha Wasiirada kadib markii ay dhagaystaan Wasiirka hay'adda ku shaqada leh iyo Guddiga Shaqaalaha Rayidka ee Dowladda.
- In Wasiirka Shaqada iyo Arrimaha Bulshadu uu ka diiday Hanti-dhowrka Guud iyo Guddiga Anshax-marinta warbixin ay ka soo gudbiyeen muwakiliintiisa sida ku cad warqadda sum:WSHAB/XW/327/2020 ee 18/06/2020.
- In Hanti-dhowraha Guud uu mar labaad soo saaray go'aanka sum; XHG/HG-177/2020 ee 15/07/2020, kaas oo uu ku waafaqay go'aanka Guddiga Anshax-marinta ee Hanti-dhowrka, go'aankaas oo aan lagu saleyn asbaab maangal ah iyo caddeymo sugar.



- In uu si sharci darro ah u soo dhex galay Guddoomiyaha Guddiga Shaqaalaha Rayidka ee Dowladda, uuna soo saaray go'aan shaqo kassaariid ah, xit ku cad warqadda Sum:XGG/NCSC/0693/08/2020 ee 05/08/2020, taas oo ah mid uu jeebkiisa kala yimid maadaama uusan sharcigu siinin awood noocaas ah.
- In go'aanka Guddoomiyaha Guddiga Shaqaalaha Rayidka ee Dowladda uu yahay xadgudub awoodeed, uuna ku gefay Qod.250 XCS, markii uu isticmaalay awood aanu sharcigu siinayn, maadaama awooddas uu iska lahaa Golaha Wasiirada sida ku cad sharci Lr.11, Qodobkiisa 46 xarafka (j).
- In muwakiliintiisa laga joojiyay soo gelitaanka Madaxtooyada, qof shaqaale ahna waxa looga mamnuuci karaa oo keli ah ay tahay arrin nabad galiyo, arrintaasna aysan jirin.
- In shaqaalaha qaabka shaqada looga saaro uu nidaaminayo sharci Lr.11, Qod.45 oo tilmaamaya tallaabooyinka anshax marinta, ayna ka mid yihiin tallaabooyinkaas ganaax iyo canaan qoraal ah iyo mushahar dhimis ilaa iyo 11 tallaabo oo kale, waxaana ugu dambeeyaa shaqo ka saarid.
- In Agaasime xil aan looga qaadi karin go'aan guddi sida ku cad Qod. 46 ee sharciga shaqalaaha, kaas oo ka hadlaya qaabka shaqaalaha looga saaro shaqada, iyo isla qaabkaas loo magacaabo.
- In Maxamed xuseen lagu eeddeeyay in gabar la dhaho Fartuun Maxamed Xuseen looga shaqaaleysiyyay Wasaaradda Caafimaadka, arrintaasna ay tahay wax kama jiraan gabadhaasna iyada codsatay shaqadaa ku meel gaarka ahayd ee mashruuca tallaalka, ayna u qalantay shaqadaas maadaama ay jaamiciyad ahayd, sidaas darteedna aysan jirin sabab loogu eeddeeyo Maxamed.
- In Xuseen Xasan lagu eeddeeyay in uu shidaal qaatay, laakiin isagu sheegay in ay u tageen nin Agaasime ah oo ay saaxiibo yihiin, kana qaateen 20 litir oo shidaal ah iyo maalin qadadeed oo aan dhammayn 50 dollar, arrintaasna aysan ahayn arrin shaqadooda looga ceyrin karo, xitaa in la beddelo ayaa Wasiirka Shaqada hore uga soo diiday iskaba dhaaf shaqo ka saaride.
- In la sheegay in muwakiliintiisu ku milmeen Wasaaradaha Dowladda, laakiin laga rabo dhinaca kale in ay caddeeyaan sababta ay ugu milmeen iyo ujeeddada ay ka lahaayeen.
- In la sheegay in ay dhaqaale ka qaateen Hay'ad kale balse aan la sheegin cidda ay ka qaateen iyo inta ay qaateen iyo sababta ay u qaateen midna.
- In Maxamed Xuseen ay hawl baaris ahi ugu dambeysay 2017, halka Xuseen iyo C/naasir ay ugu dambeysay hawl baaris 2015 kii.





- In muwakiliintiisa aan lagu eedayn karin in ay laaluush qaateen maxaa loo diray iyaga baaris shaqo kuma lahayn waqtigaas, mana ahayn dad loo diray hawl baariseed.

## Jawaab-celinta iyo dooddii Garyaqaanka Guud ee Dowladda

Nuxurka Jawaab-celinta iyo dood-afeedkii qareenada ka socda Xafiiska Garyaqaanka Guud ee Dowladda ay ka jeediyeen garmaqalladii dacwadda ee kala geddisnaa waxuu ahaa sidan soo socota:

- In Guddiga Dallacaadda, Abaal-marinta iyo Anshaxa ee Xafiiska Hanti-dhowrka Guud uu go'aan anshax marin ah ka gaaray soo cabtayaasha si waafaqsan Qod.38<sup>aad</sup> Farqadiisa 1<sup>aad</sup> iyo Qod.45<sup>aad</sup> Faqradiisa 1<sup>aad</sup> xarafkiisa (sh) ee sharci Lr.11 ee 5 December 2006.
- In Guddiga sare ku xusan ay Hanti-dhowraha Guud u soo jeediyeen in shaqaalahaa Dowladda laga saaro soo cabtayaasha maadaama ay ku xadgudbeen Qod.23<sup>aad</sup> faqradiisa 4<sup>aad</sup>, 8<sup>aad</sup> iyo 12<sup>aad</sup> iyo Qod.24<sup>aad</sup> faqradiisa 1<sup>aad</sup> xarafka (b) iyo Qod.45<sup>aad</sup> faqradiisa 3<sup>aad</sup> xarfihiiisa (b, t, d) ee sharci Lr.11 ee 5 December 2006, sida ku cad warqadda sum: XHG/GDAA-003/2020 ee tr.14/07/2020 kana soo baxday Guddiga Dallacaadda, Abaal-marinta iyo Anshaxa ee Xafiiska Hanti-dhowrka Guud.
- In Hanti-dhowraha Guud uu ku waafaqay go'aankaas shaqo ka saarista ah ee ka soo baxay Guddiga Dalacaadda, Abaal-marinta iyo Anshaxa.
- In Hanti-dhowraha Guud uu ka codsaday Guddiga Shaqaalahaa Rayidka ee Dowladda in laga saaro diiwaanka guud ee Shaqaalahaa Rayidka ee Dowladda soo cabtayaasha sida ku cad warqadda sum:XHG/HG-177/2020 ee tr.15/07/2020.
- In Guddiga Shaqaalahaa Rayidka ay ku waafaqeen Xafiiska Hanti-dhowrka Guud shaqo ka saaridaas maadaama soo cabtayaashu ku xadgudbeen anshaxa iyo hufnaanta shaqaalahaa Dowladda sida ku cad warqadda sum; XGG/NCSC/0693/08/2020 ee tr.05/08/2020.
- In go'aanka ka soo baxay Hanti-dhowrka Guud uu yahay mid loo maray dhammaan habraacyadii sharcigu jideeyay si waafaqsan sharciga Xafiiska Hanti-dhowrka Guud Lr.34 ee tr.14/04/1972 iyo Qod.33<sup>aad</sup> ee DKG ee JFS.
- In soo cabtayaashu ay ku milmeen Hay'adihii baarista loogu diray, iyagoo ku gefay Qod.23 ee sharci Lr: 11 soo baxay 5 December 2006, farqada 12<sup>aad</sup>.



- In soo cabtayaashu ay ku kaceen falal liddi ku ah mabaadida caamka ah ee shaqaalaha iyo sharciga Dowladda.
- In shaqo ka saarista soo cabtayasha la soo marsiiyay heerar kala duwan; marka koowaad uu ka soo bilowday Guddiga shaqada iyo shaqaalaha ee Xafiiska ay ka shaqeeyaan, ayna ku xigtay Guddiga Dallacuudda iyo Anshax-marinta, uuna u dambeyay Hanti-dhowraha Guud, kaas oo ah qofka Maamulka ugu sareeya ka haya Hay'adda.
- In shaqo ka saaridda ay ka horraysay in la canaantay, loona digay soo cabtayaasha, kadibna tallaabada u danbeysay ay noqotay shaqo ka saarid si waafaqsan Qod.55<sup>aad</sup> f/1aad xarafka (b) ee Sharciga Shaqaalaha Dowladda.
- In Xafiiska Hanti-Dhowrku uu leeyahay miisaaniyad, miisaaniyadiisana uu ka mid yahay shidaal, markaa haddiiba shidaal loo baahan yahay Xafiiska la weydiisan karay laakiin iyagoo arrintaas baalmaray ay qaateen waxaysan xaq u lahayn.
- In sida hadda lagu dhaqmo ay tahay siduu qofka shaqada ku soo galo isla sidaas in uu uga baxo, sidoo kalena aysan jirin shaqaale Grade A ah oo Degreeto Madaxweyne ku soo baxa oo aan ka ahayn Xog-hayeyaasha, Agaasime-yaasha Guud, Garsoorayaasha iyo Xeer-Ilaaliyayaasha.

Intaa ka dib Maxkamaddu waxay fartay dhinacyada dacwadda in ay soo gudbiyaan codsiyadooda kama dambaysa ah;

### **Gebo-gebada Qareenka Soo Cabtayaasha**

Qareenka Soo cabtayaashu wuxuu Maxkamadda ka codsaday sidan soo socota:

- In Maxkamaddu wax kama jiraan ka dhigto go'aanada sharciga khilaafsan ee ka soo baxay Hanti-dhowrka Guud iyo Guddoomiyaha Guddiga Shaqaalaha Raydika ee shaqada looga saaray soo cabtayaasha.
- In lagu celiyo soo cabtayaasha shaqadoodii iyo darajoooyinkoodii.
- In la siiyo mushaharooyinkoodii iyo xuquuqdii shaqaalanimo ee ka baaqday, taas oo ka soo billaabaneysa 3 Augusto 2020.
- In Hanti-dhowrka Guud lagu xakumo qarashkii dacwadda iyo xushmadii qareenka si waafaqsan Qod.62 XHMS.



## Gebo-gebada Garyaqanka Guud ee Dowladda

Qareennada Laga Cabtuhu waxa ay Maxkamadda ka codsadeen sidan soocota:

- In la diido arjiga soo cabtayaasha ee aan sharciga waafaqsanayn.
- In la oggolaado jawaab-celinta Xafiiska Garyaqanka Guud ee Dowladda, taas oo ku saaleysan fal iyo xeer sharciga waafaqsan.
- In laga soo saaro dacwaddan go'aan caddaalad ah oo waafaqsan sharciga.
- In lagu xukumo dhinaca kale xushmadda Qareenka iyo qarashkii Dacwadda si waafaqsan Qod.5<sup>aad</sup> faqradiisa 2<sup>aad</sup> ee sharci Lr.18 ee 29 janaayo 1976 iyo Qod.62 XHMS.



## Asbaabta Xukunka

**Maxkamadda Sare ee Dalka:** markii ay dhageysatax dooddii chinacyada, caddaymihi ay horkeeneen iyo codsiyadooda gebagebada, si mug lehma u baartay dhammaan warqaddaha ku jira galka dacwadda, qiimayn buuxdana ku samaysay dhammaan cabashada.



Marka ugu horreeyso si uu go'aanka anshax-marinta shaqaalahu u noqdo mid waafaqsan sharciga waxaa loo baahan yahay in ay jiraan arrimahan:

1. In ay jirtay dhacdo ama fal uu sharciga shaqaalahu u aqoonsan yahay mid lagu muteeysanayo tallaabo anshax-marin si waafaqsan qodobka 45<sup>aad</sup> faqradiisa 1<sup>aad</sup> Sharciga Shaqaalahu Rayidka ee Dowladda Sharci L.11, Dis, 5, 2006 (Sharciga Shaqaalahu), dhacdadaas ama falkaasina aanu ahayn mid loo gudbiyay Maxkamad si waafaqsan qodobka 45<sup>aad</sup> faqradiisa 3<sup>aad</sup>.
2. In la maray habka qaadista dacwadda anshaxa ah iyo gaarista go'aannada maamulka si waafaqsan qodobka 47<sup>aad</sup> Sharciga Shaqaalahu iyo qodobka 33<sup>aad</sup> ee Dastuur Ku-Meel Gaarka ah (DKMG).
3. In cidda qaaday tallaabadaasi ay tahay ciddii uu sharciga awoodda u siiyay.

Iyada oo arrimahaasi laga duulayo Maxkamadda waxaa u caddaatay:

1. In falalka iyo dhacdooyinka loo cuskaday anshax-marinta ee uu sheegay Xafiiska Hantidhawrku ay yihiin kuwa ku xusan qodobada sharci ee uu Xafiisku tilmaamay balse xaqijintooda iyo ka sal-gaaridda jiritaankooda waxa ay ahayd in loo maro habka uu sharcigu waajibiyay, taas oo aan loo marin sida ku faahfaahsan tirsiga xiga ee sababayntan.
2. In aan la marin habka qaadista dacwadda anshaxa ah ee uu waajibinayo qodobka 47<sup>aad</sup> Sharciga Shaqaalahu oo uu si faahfaahsan ugu cad yahay habkaasi, anshax-marinta uu ku dooday Xafiiska Hantidhawrka Guud looma marin habkaasi, sababta oo ah:
  - 2.1. Ma jirin dacwad anshax oo qraal ah oo loo gudbiyay guddiga qaadisteeda awoodda u leh oo ah guddiga ku xusan qodobka 38<sup>aad</sup> ee Sharciga Shaqaalahu, dacwaddaas oo ay waajib tahay in lagu gudbiyaa muddo bil gudaheed ah laga bilaabo maalinta uu dhacay falka keenaya anshax-marinta si waafaqsan qodobka 47<sup>aad</sup> faqradiisa 1<sup>aad</sup> Sharciga Shaqaalahu, dhacdooyinka anshax-marinta loo cuskaday waa kuwa ay ka soo wareegtay sheegashada jiritaankooda ugu yaraan



muddo sanad ah ama ka badan, maxaa yeelay dhacdooyinkaasi sida ku cad qoraallada caddeyn ahaanta looga qoray cabteyaasha ee mu Xafiisku ku soo gudbiyay fadhigii Maxkamadda, waxa ay dhaceen sanadaha kala ah: 2015, 2016, 2017 iyo 2019, halka qoraallada anshax-marinta loo cuskatay ay bilowdeen markii ugu horreysay 2020, taas oo aad uga badan mudadii ay ahayd in arrintaasi lagu gudbiyo dacwadeeda oo ah muddo bil ah, haddii aan habraacaasi la marinna aanay wax ka soo qaad yeelanaynin dacwaddaas si waafaqsan isla qodobka 47<sup>aad</sup> faqradiisa 1<sup>aad</sup> Sharciga Shaqaalaha.

- 2.2. Ma jiro qoraal uu sameeyay guddiga awoodda u leh qaadista dacwadda anshaxa ah, qoraal kaas oo lagu ogaysiinayo qofka la dacweynayo taariikhda dacwadda la gelayo, iyada oo la gaarsiinayo nuqul dacwadda loo haysto ugu yaraan 24 saac ka hor inta aan dooddu furmin, nuqulkaasna ay tahay in ay ka muuqato arrinta qofka lagu soo eeddeeyay, dhammaan habraacaas oo ay waajibinayso faqrada 2<sup>aad</sup> ee qodobka 47<sup>aad</sup> ee Sharciga Shaqaalaha lama marin mana jirto wax caddeyn ah oo muujinayso in la maray, Maxkamadduna markii ay weydiisay Garyaqanka ka socday Xafiiska Garyaqanka Guud oo dacwada ku matalay Xafiiska Hantidhawrka Guud, ma soo bandhigin wax qoraal ah oo caddeynaya in la maray habraacaasi.
- 2.3. Ma jirto wax caddeyn ah oo muujinaysa in la maray habraaca ku xusan faqrada 3<sup>aad</sup> ee qodobka 47<sup>aad</sup> ee Sharciga Shaqaalaha, habraacaas oo ay ka mid tahay:
- 2.3.1. In la qaado caddeymaha labada dhinac (hay'adda iyo qofka la dacweynayo ee shaqaalaha ah), qofka shaqaalaha ah ee la dacweynayana uu xaq u leeyahay in uu goob-joog ka ahaado dhammaan tallaabooyinka dacwadda, uuna helo difaac buuxa iyada oo hay'addu u fududeynayso helitaanka waxii caddeyma ah ee uu difaaciisa uga baahdo.
- 2.3.2. In laga sameeyo dhageysiga dacwadda hadal-qoraal/war-qor/maxdar kaas oo koobaya waxii caddeyn ah ee la qaaday iyo sidii dooddu u dhacday.
3. In gaarista go'aanka maamul ee cabteyaashu ka soo cabteen aan loo marin habka gaarista go'aannada maamulka ee uu waajibinayoo qodobka 33<sup>aad</sup> ee DKMG, kaas oo u dhigan sida tan: (Qof kasta wuxuu xaq u leeyahay in go'aammada ka soo fula maamullada ay ahaadaan kuwo ku dhisan sharci, maangal ah, go'aan-ka-gaaristoodana loo maray hannaan caaddil





ah.), in go'aanka maamul ee cabteyaasha shaqada looga saaray aan loo marin si waafaqsan qodobkaasi dastuurka ahna waxa ay ku faahfaahsan tahay tirsiga hore ee sababayntan.

4. In aanay waafaqsanayn sharciga doodda qareenka cabteyaasha ee ah in cidda qaaday tallaabandan aanay ahayn ciddii awoodda u lahayd isaga oo ku dooday in shaqaalaha noocan oo kale ah shaqada looga saari karo Xeer Ra'iisul-Wasaare taas oo uu u cuskaday qareenku qodobka 46<sup>aad</sup> faqradiisa 1<sup>aad</sup> xarafka (J) Sharciga Shaqaalaha, sababta aanay u waafaqsanayn sharciga waa in mabaadi'da guud ee sharciyada maamulka/Idaariga marka laga hadlayo magacaabista iyo ka qaadista xilalka iyo shaqooyinka guud ahaan, ay tahay in qofka leh awoodda magacaabista isla isagu leeyahay awoodda ka qaadista, si kale haddii loo dhigo qofka waxa uu ku baxayaan ama ku weynayaa shaqadii ama xilkii uu hayay hadba sidii uu ku yimid, haddaba cabteyaashu si ay ugu doodaan in shaqo ka saariddoodu ay ahayd in lagu soo saaro Xeer Ra'iisul-Wasaare waxaa ka horreysa iyagu ma ku yimaadeen habraacaas, jawaabtu waa maya oo kuma aysan iman balse waxa ay ku yimaadeen oo go'aanka ugu dambeeyaa ee magacaabistooda lahaa Guddiga Shaqaalaha Rayidka ee Dowladda sida cad warqadda magacaabista ee mid ka mid ah cabteyaasha kaas oo ah Maxamed Xuseen Cali "Idle" Maxkamadduna markii ay weydiisay cidda lahayd go'aankii ugu sarreeyay ee lagu soo magacaabay ay uga hor jawaabeen dhammaantood in sidaasi lagu magacaabay, sidaa darteed dooddaasi ma waafaqsana sharciga.

Asbaabta kor ku xusan aawadeed tallaabada lagu sheegay anshax-marinta ee lagu sameeyay cabteyaasha ma ahan mid waafaqsan sharciga, waxaana waxba kama jiraan ah dhammaan tallaaboooyinka iyo go'aannada shaqada looga saaray cabteyaasha ee lagu saleeyay arrintaas uu Xafiska Hantidhawrka Guud ku sheegay anshax-marin.



## Xukunka Maxkamadda




Iyada oo cuskatay asbaabta kor ku xusan, Maxkamaddu:

1. Waxa ay xukuntay in aanu waafaqsanayn sharciga go'aanka summaddiisu tahay: XHG/HG-177/2020 tr.15/07/2020 ujeedadiisuna tahay (ku-waafaqid Shaqo Ka Saarid Shaqaale) kana soo baxay Hantidhawraha Guud ee Qaranka.
2. Waxa ay baabi'isay go'aanka tirsiga hore ku xusan iyo dhammaan tallaabooyinkii ka horreeyay ee lagu dhisay soo saaristiisa iyo kuwii ka dambeeyay ee lagu saleeyay go'aankaasi.
3. Waxa ay baabi'isay dhammaan waxii saamayn ah ee ka dhashay go'aankaasi.
4. Waxa ay u xukuntay cabteyaasha: Maxamed Xuseen Cali, Xuseen Xasan Colow iyo Cabdinaasir Maxamed Xasan, waxii xuquuq shaqaale ah ee ay lahaayeen oo ay ku waayeen go'aanka tirsiga 1<sup>aad</sup> ku xusan sababtiisa.
5. Waxa ay ku xukuntay qarashka dacwadda iyo xushmadda qareenka ee ka baxay cabteyaasha Xafiiska Hantidhawraha Guud ee Qaranka.

Xukunkan waxa lagu gaaray Muqdisho 18/08/2021.

Garsooreyaasha Maxkamadda Sare ee Dalka ee Dacwaddan:

1. C/Xaq Sh. Cumar Maxamed  Guddoomiye.
2. Cabdulqaadir Idiris Ciise  Xubin.
3. Cabdiqafaar Xuseen Isaaq  Xubin.

C/najiib Xersi Culusow najiib Kaaliye

